



**Uffeci communal Lumnezia / Gemeindeamt Lumnezia**  
Canzlia communal / Gemeindekanzlei  
7144 Vella

Tel 081 920 60 00

e-mail: [info@lumnezia.ch](mailto:info@lumnezia.ch)

[www.lumnezia.ch](http://www.lumnezia.ch)

---

---

## PROTOCOL RADUNONZA COMUNALA LUMNEZIA 23 D'AVREL 2021

---

2021/01

23 D'AVREL 2021  
CANZLIA COMUNALA LUMNEZIA  
Palus 32D, 7144 Vella

**Tractandas**

1. Avertura ed elecziun dils dumbravuschs.....	2
2. Protocol dalla radunonza communal da dils 18 da december 2020 (2020/02) .....	2
3. Elecziun dils commembers dalla cumissiun da baghegiar per la vischnaunca Lumnezia per la perioda d'uffeci 2021-2024.....	3
4. Manteniment dalla via da meglieraziun Spezembien (Frust Grond) el vischinadi da Vrin	3
b) Concessiun dil credit da CHF 350'000 .....	3
5. Renadaquens finals.....	4
a) Sanaziun dalla via da funs Schlareins – Bars (Lumbrein/Vignogn) .....	4
b) Sanaziun dalla via d'ual Tersnaus – spartgida Cunscharola (Tschamiu).....	4
c) Sanaziun dalla via communal Sogn Roc – Trutg / Sur Mulins, Vella .....	4
6. Varia.....	5

## Protocol dalla radunonza communal Lumnezia (2020/01)

Datum: Venderdis, ils 23 d'avrel 2021  
 Liug: Halla plurivalenta dalla casa da scola Sutvitg 28E, 7144 Vella  
 Cuoz: 20:00 – 21:00 uras  
 Presents: 48 votantas e votants  
 Parsura: Daniel Solèr, president communal  
 Actuara: Silvana Caviezel, actuara substituta

### Tractandas

#### 1. Avertura ed elecziun dils dumbravuschs

Il president communal Daniel Solèr arva la radunonza communal fagend beinvegni als presents, en special al convischin e cusseglier guvernativ, Marcus Caduff ed engrazia ad els d'haver dau suatientscha agl invit malgrad la situaziun da corona.

Igl ei l'emprema radunonza communal che Daniel Solèr astga tgamunar sco niev president communal dalla vischnaunca Lumnezia ed el sa constatar suenter biebein 100 dis intensivs el niev uffeci, che l'entschatta ei bein gartegiada.

Daniel Solèr ei fetg loschs d'astgar tgamunar la vischnaunca Lumnezia ed ei cun tgierp ed olma president communal. Era la suprastonza communal e la cumissiun da quen e gestiun lavuran en nova constellaziun ed han medemamein dau ina bun'entschatta.

Grond plascher ha il president communal era giu dallas visetas en canzlia sco era da divers telefons da convischinas e convischins ed el constatescha che mo ensemen savein nus contonscher in bein prosperar da nossa vischnaunca. Il discuors persunal porti la finfinala dapli che da scriver brevs.

Deplorablamein ei in dils commembers ch'era vegnius elegius en suprastonza communal seretratgs avon ch'entrar en uffeci ed aschia eis ei stau dad ir alla tscherca da novs candidats. L'elecziun dil schef ni dalla schefa dil departament communal per fatgs da baghegiar vegn ad haver liug a caschun dalla votaziun all'urna dils 19 da zercladur 2021.

Il president communal Daniel Solèr constatescha, che la radunonza communal ei vegnida convocada ad uras conform allas determinaziuns digl artechel 44 ella constituziun dalla vischnaunca Lumnezia, aschia che la radunonza ei cumpetenta da prender conclus.

La radunonza communal approbescha la gliesta da tractandas dils 29 da mars 2021 presentada dalla suprastonza communal.

Seschau perstgisar ha:

- Marcus Cavegn, canzlist communal

La radunonza elegia dus dumbravuschs:

- Martin Capaul da Lumbrein
- Remo Caminada da Vella

#### 2. Protocol dalla radunonza communal dils 18 da december 2020 (2020/02)

Il protocol dalla davosa radunonza communal dils 18 da december 2020 ei staus exponius ella canzlia communal e silla pagina d'internet dalla vischnaunca duront 30 dis.

Il president communal Daniel Solèr constatescha ch'igl ei buca vegniu inoltrau recuors en scret aschia ch'il protocol dalla radunonza communal dils 18 da december 2020 (2020/02) vala sco approbaus.

### **3. Elecziun dils commembers dalla cumissiun da baghegiar per la vischnaunca Lumnezia per la perioda d'uffeci 2021-2024**

Tenor constituziun ha la radunonza communal d'eleger la cumissiun da baghegiar per la perioda d'uffeci 2021 – 2024. La cumissiun da baghegiar secumpona da treis commembers. Il schef dil departament communal per fatgs da baghegiar ei ex officio commember dalla cumissiun da baghegiar. Perquei ein d'eleger dus commembers dalla cumissiun da baghegiar.

Ils dus commembers Armin Caviezel da Vrin e Gino De Giorgi da Vella vevan buca candidau per la nova perioda d'uffeci. Perquei ha la vischnaunca Lumnezia encuriu candidats per l'elecziun dalla cumissiun da baghegiar communal. Entochen la fin digl onn 2020 eran neginas annunzias per candidaturas vegnidas inoltradas perquei era la tractanda vegnida spustada.

La cumissiun da baghegiar ha ina funcziun consultativa per la suprastonza communal ch'ei l'istanza da baghegiar. Las competenzas ed obligaziuns dalla cumissiun sedrezzan tenor la lescha da baghegiar dalla vischnaunca, numnadamein la lescha da baghegiar Lumnezia – senza Vrin dils 5 d'october 2018 respectivamein la lescha da baghegiar Vrin dils 31 da mars 2000.

Ultra dallas lavurs ordinarias ha la suprastonza communal surdau alla cumissiun da baghegiar incumbensas ch'ei fixadas el Reglament per la delegaziun da cumpetenzas dalla suprastonza communal dils 11 da settember 2017.

Cun ir activamein alla tscherca ha la suprastonza communal anflau in candidat ed ina candidata ch'ei stai a disposiziun per l'elecziun ella cumissiun da baghegiar:

- Gian Peider Casanova da Vella, annada 1987, responsabel da marketing e vendita tier Truffer SA, Val s. Pieder
- Alexa Cavegn da Vella, annada 1994, architecta tier spacial design, Trun

Ord il miez dalla radunonza communal vegnan buca fatgas ulteriuras propostas per candidaturas.

#### **Proposta**

La suprastonza communal propona d'eleger Gian Peider Casanova da Vella ed Alexa Cavegn da Vella ella cumissiun da baghegiar per la vischnaunca Lumnezia per la perioda d'uffeci 2021-2024.

#### **Conclus**

La radunonza communal concluda unanimamein e senza abstenziuns d'eleger Gian Peider Casanova ed Alexa Cavegn, omisdus da Vella, ella cumissiun da baghegiar per la vischnaunca Lumnezia per la perioda d'uffeci 2021-2024.

Il president communal gratulescha als dus niev elegi ed engrazia als commembers dalla cumissiun da baghegiar transitoria per lur lavur interimistica entochen dacheu.

### **4. Manteniment via da meglieraziun Spezembien (Frust Grond) el vischinadi da Vrin**

#### **a) Approbaziun dil project**

#### **b) Concessiun dil credit da CHF 350'000**

#### **Situaziun iniciala**

La via da meglieraziun Spezembien (Frust Grond) el vischinadi da Vrin ei en in schliet stan e basegna remedura.

Il schef dil departament communal per agricultura, Martin Sgier presenta il project alla radunonza communal.

Sin ina lunghezia da circa 730 m sto la via vegnir ulivada suenter che malauras ed urezis ha lavau ora quella pulitamein. Ei vegn baghegiu en vials da betun e garter da crappa. Las lavurs ein planisadas naven da miez matg tochen miez zercladur 2021 ed igl ei quintau da saver finir quellas avon che la cultivaziun dil fons encunter il pez da Vrin entscheiva ils 15 da fenadur.

Ils cuosts per la sanaziun dalla via ein vegni calculai sin fundament d'offertas:

Per lavurs d'impressari	CHF 340'000.00
Survigilonza	CHF 6'000.00
Nunprevediu	<u>CHF 4'000.00</u>
<b>Total</b>	<b>CHF 350'000.00</b>

Ils cuosts vegnan surpri per 75% dalla vischnaunca Lumnezia e per 25% ord il fondo da meglieraziuns, il qual munta actualmein ad 1.2 milliuns francs.

### **Conclus**

La radunonza communal concluda unamimamein e senza abstenziuns d'approbar il project per il manteniment dalla via da meglieraziun Spezembien (Frust Grond) el vischinadi da Vrin e conceda il credit da CHF 350'000.

## **5. Renadaquens finals**

### **a) Sanaziun dalla via da fons Schlareins – Bars (Lumbrein/Vignogn)**

#### **Situaziun iniciala**

La radunonza communal dils 14 da zercladur 2019 ha decidiu cun gronda maiortad, senza cuntravusch ed abstenziuns, d'approbar il project e da conceder in credit da CHF 450'000 per sanar la via da fons Schlareins – Bars.

Il project ei vegnius realisau e siara cun cuosts da CHF 410'548.30, pia cun in rest da credit da CHF 39'451.70.

#### **Conclus**

La radunonza communal concluda unanimamein e senza abstenziuns d'approbar il rendaquen final per la sanaziun dalla via da fons Schlareins – Bars cun in rest da credit da CHF 39'451.70.

### **b) Sanaziun dalla via d'uaul Tersnaus – spartgida Cunscharola (Tschamiu)**

#### **Situaziun iniciala**

Ils 21 da zercladur 2020 ha la cuminonza da votantas e votants all'urna approbau il project e concediu il credit da CHF 380'000 per la sanaziun dalla via d'uaul Tersnaus – spartgida Cunscharola (Tschamiu).

Il project ei vegnius realisau e siara cun cuosts da CHF 280'084.66, pia cun in rest da credit da CHF 99'915.33.

#### **Conclus**

La radunonza communal concluda unanimamein e senza abstenziuns d'approbar il rendaquen final per la via d'uaul Tersnaus – spartgida Cunscharola (Tschamiu) cun in rest da credit da CHF 99'915.33.

### **c) Sanaziun dalla via communal Sogn Roc – Trutg / Sur Mulins, Vella**

#### **Situaziun iniciala**

Ils 21 da zercladur 2020 ha la cuminonza da votantas e votants all'urna approbau il project e concediu il credit da CHF 325'000 per la sanaziun dalla via communal Sogn Roc – Trutg / Sur Mulins, Vella.

Il project ei vegnius realisau e siara cun cuosts da CHF 313'397.60, pia cun in rest da credit da CHF 11'602.40.

### **Conclus**

La radunonza communal concluda unanimamein e senza abstenziuns d'approbar il rendaquen final per la via communal Sogn Roc – Trutg / Sur Mulins, Vella cun in rest da credit da CHF 11'602.40.

## **6. Varia**

### **1) Il president communal, Daniel Solèr orientescha:**

#### **Filiala dalla posta a Vella**

La Posta SA siara la filiala da Vella il november 2021. Ils survetschs da posta vegnan purschi naven da lu cun integrar quels ella stizun dalla Vival Lumnezia a Vella.

#### **Stizun dil Volg a Vignogn**

La Volg Detailhandels AG ha communicau ch'il Volg da Vignogn vegni serraus ils 31 d'october 2021. Quei munta che era la filiala da posta, ch'ei integrada ella stizun vegn serrada. Il vischinadi da Vignogn vegn survius naven dil november cun survetsch da casa.

Ina gruppa d'interess ei seformada per anflar autras sligaziuns per ina stizun el vischinadi da Vignogn.

#### **Reit da colligiaziun Swisscom**

La Swisscom ei vidlunder da baghegiar ora la reit cun fibra da veider sigl entir intschess communal tochen vitier las casas. Quei succeda entochen la fin october 2021. La fasa finala cun fibra da veider ellas casas succeda en in secund pass pli tard.

#### **Covid-19**

Ensemen cun representants dallas vischnaucas da Breil, Glion, Obersaxen Mundaun e Lumnezia e cun la Surselva Tourismus SA ei vegnida fundada la Taskforce Surselva per coordinar las mesiras encunter il virus da corona, Covid-19.

Il stab directiv communal ei medemamein staus activs ed il president communal appellescha a vischinas e vischins da tener vinavon la dira e setener vid las reglas da cumportament per vegnir da surmontar la pandemia aschi spèrt sco pusseivel.

In grond compliment ed engraziament drezza il president communal Daniel Solèr al cusseglier guvernativ Marcus Caduff, ch'ei semess en fetg per mesiras da corona praticablas en Surselva durant la stagiun d'unviern.

#### **Plazza per ina collaboratura ella partiziun finanzas**

La collaboratura Tajana Alig ha visau la plazza sin la fin d'uost 2021 e la suprastonza communal ha elegiu Nicole Venzin da Medel sco nova collaboratura. Ella habitescha actualmein a Glion ed ha l'intenziun da vegnir en Lumnezia a habitar. Ella vegn ad entrar en plazza l'entschatta settember 2021.

#### **Reorganisaziun dall'administraziun communal**

Il canzlist communal e menader digl uffeci da baghegiar, Marcus Cavegn e dus ulteriurs collaboraturs dall'administraziun communal vegnan pensiunai enteifer ils proxims dus onns, quasi tuts il medem temps

Ensemen culla cumissiun da quen e gestiun communal ei ina gruppa da lavur interna vida preparar lur successiuns.

### **Planisaziun locala**

La suprastanza communal ha prolunghiu il perimenter da planisaziun tochen il mars 2023. La planisaziun locala ei ina gronda sfida. Las damondas sunter terren da baghegiar ein s'augmentadas considerablamein il davos temps ed en general vegn baghegiu fetg bia. La vischnaunca Lumnezia inoltrescha giu Cuera las pli biaras damondas da baghegiar digl entir cantun Grischun.

### **Collaboraziun cun "Bergversetzer"**

La collaboraziun cun l'instituziun "Bergversetzer" remplazza la collaboraziun cun "Bergwaldprojekt", ch'era vegnida visada el decuors dil 2020.

### **Archiv cultural Lumnezia ad Uors**

Il president communal engrazia al menader digl archiv cultural Lumnezia ad Uors, Simon Derungs ed appellescha da rimnar e surdar ad el documents vegls avon che dismetter quels, seigi quei documents privats ni era dallas uniuns.

### **Differents projects actuals**

- Local per uniuns el vischinadi da Cumbel
- Scola Sutvitg el vischinadi da Vella
- Provediment aua a Lumbrein-vitg

## **2) Damondas e posiziuns dalla radunonza communal**

- Vinzens Capaul da Lumbrein damonda cura ch'ei vegni allontanau il material dallas petgas ch'eran stadas montadas per far mesiraziun pil parc da vent sigl Um su.

Il president Daniel Solèr declara che quei material seigi ella massa da concuors dalla Altaventa ed astgi perquei buca vegnir allontanaus e dismiss aschiditg che quei cass seigi buca serrau giu.

- Curdin Derungs da Morissen fa attents ch'ei seigi da ponderar bein da schar serrar la posta e la stizun dil Volg sch'ei dat schi bia damondas per terren da baghegiar. Era las bancas han aviert mo pli certas uras e mo mintg'auter di. Quei ein piazzas da lavur che van a perder ella val ed ha da far cull'attractivitat dalla vischnaunca. La populaziun sto denton prender sesezza pil nas ed era nezegiar las purschidas ella val. Autramein eis ei buca d'impedir che quellas instituziuns vegnan serradas. La digitalisaziun va anavon cun gronds pass ed oravontut per personas ch'ei buca mobilas vegnan ils survetsch adina menders.

Il president Daniel Solèr sincerescha che la suprastanza communal ha fatg il pusseivel encunter quellas decisiuns. Quellas ein denton vegnidas pridas dad autras instanzas e la vischnaunca ha buca giu influenza. Era Daniel Solèr conferma ch'ei schai vida mintgina e mintgin da far diever dallas purschidas ella val. Ei gida buca selamentar pér cu las decisiuns ein pridas.

- Vinavon damonda Curdin Derungs sch'ei fussi buca neras uras da metter en gia ussa ina persuna en pensum da 50%, che savess surprender la lavur dil menader actual igl uffeci da baghegiar.

Il president Daniel Solèr explica che quella piazza seigi stada scretta ora ed ei hagi dau buc ina solia annunzia. La piazza vegn en mintga cass puspei publicada, ei vegn denton buca ad esser sempel d'anflar quella persuna. Perquei seigi ei prudent d'encurir activamein pusseivlas candidatas e candidats.

- Marco Casanova da Lumbrein damonda tgei che seigi il stan actual dil project per la tualetta publica da Lumbrein. La tualetta pari dad esser finida, seigi denton tuttina adina serrada.

Primus Cavegn, schef dil departament communal per la planisaziun dil territori ed immobiglias declara: La tualetta ei finida e las lavurs vegnan pridas giu ton pli spèrt per lu saver arver ella.

### 3) Finiziun

Il president communal Daniel Solèr engrazia als convischins che han priu part dalla radunonza communal per lur preschientscha e buna collavuraziun. El giavischa in bien retuorn a casa.

Per prevegnir a pusseivlas infecziuns cul coronavirus Covid-19 ha igl aperitiv usitau buca liug.

7144 Vella, ils 23 d'avrel 2021

Il president:

L'actuara substituta:

Daniel Solèr

Silvana Caviezel